

Ilageeqarneq pillugu Inatsisartut inatsisissaattut siunnersuut

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

Akissuteqaat

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

Aappassaaneerinnineq

Naalakkersuisut sinnerlugit Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliaq qutsavigaara Ilageeqarneq pillugu Inatsisartut inatsisissaattut siunnersuummik akuersaartumik suliarinnissimanerat pillugu.

Naalakkersuisut nuannaarutigaat, partiit tamarmik Inuit Ataqtigiit, Demokraatit, Kattusseqatigiit Partiiat, Siumut aamma Atassut ilageeqarneq imminut ataqtigiissoq imminullu aquttoq anguniarlugu inatsisissamik siunnersuutip siunniussaamik tamakkiisumik tapersiinerat pillugu.

Naalakkersuisut maluginiarpaat, ataatsimiititaliap isumaqatigiittup kissaatigigaa provsteqarfinni ataatsimiititaliat atorunnaarsinneqarnissaata kingunerisaanik biskoppip aqutsisoqarfiata § 8-mut ilanngunneqannginnissaanik Naalakkersuisut aalajangiisimanerat itisilerneqassasoq.

Tamanna pillugu paasissutissiissutigineqassaaq, Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfimmiit biskoppip allaffia ukiup aallartinnerani ataatsimeeqatigineqarsimammat, ataatsimiinnermi ilaatigut § 8 nalileqqinneqarsimalluni. Isumaqatigiissutigineqarpoq § 8 allanngortinneqassanngitsoq, tassami biskoppip allaffissornikkut pisinnaatitaaffii tamakkiisumik siunnersuutip § 6-iani allaaserineqarsimammat.

Kiisalu Ataatsimiititaliap kissaatigaa aningaasaliissutit sorliit inatsisissatut siunnersuutip akuersissutigineqarnerani nussorneqarnissaat pillugu ilisimatinneqarnissani. Nalunaarutigineqassaaq, nussuinissap pisariaqalersinnaanerata ilanngunneqarsimanera taamaallaat ilanngunneqarmat ilisimatitsissutigiumallugu, kontut Namminersorlutik Oqartussaniit biskoppimut nuunneqartussat ullumikkut ilisimaneqartuniit allaanerusinnaanerata pissutigalugu. Oqartusaaffimik nuutsinerup aningaasaliissutit allanngortinneqarnerannik kinguneqartussaannngilaq. Agguaassisarnerup allanngortinneqarnissaa ullumikkut taamaallaat kontumut pingaarnermut 40.97.03 Kalaallit Nunaanni ilagiit-nut. Tamanna pivoq Qaanaap palaseqarfiata Avannaani provsteqarfimmut nuunneqarnerata kingunerisaanik.

Taamatut oqaaseqarlunga Naalakkersuisut sinnerlugit siunnersuut Inatsisartuni akuersaartumik oqaluuserisassanngortippara.